

四庫全書

子部

欽定四庫全書

子部

赤水元珠卷二十

詳校官太醫院醫士臣程泰

編修臣倉聖脈覆勘

總校官編修臣王燕緒

校對官助教臣卜惟吉

謄錄監生臣許蔭培

欽定四庫全書

赤水元珠卷二十

明孫一奎撰

婦人門

薛氏校註合宜禁忌凡例

一云丹溪謂白芍藥性寒味酸產後宜忌恐伐生生之氣若用之於大補湯八珍等湯內以酒拌炒用無妨凡屬脾胃虛寒虛弱面色痿黃者俱宜酒拌炒用

一通經丸若脾胃無虧暴怒氣逆或生冷所傷陰血凝滯月經不通者宜暫用之若脾胃虛弱不能生血者宜用六君當歸若因脾胃鬱火內耗其血者宜用歸脾湯若因脾肝鬱怒氣血傷而月經不通者宜加味逍遙散

一艾附丸若脾胃虛寒陰血不足氣逆發熱月經不調或胎氣不成者宜暫用之若肝腎虧損陰虛發熱月經不調或崩漏帶下或便血吐血衄小便淋瀝或晡熱

內熱寒熱往來或盜汗自汗不時倏熱宜用六味地黃丸若兼脾氣不足飲食少思者佐以六君子湯

一四物湯若脾經血燥發熱或月經不調宜暫用之若因脾經虛熱肝經怒火所致宜四君子佐加味逍遙散若因脾經氣虛血弱晡熱內熱宜用八珍湯加柴胡丹皮若因元氣下陷而致諸症宜補中益氣湯

一人參橘皮湯若胎前氣痞痰滯作嘔不食者宜暫用之若脾胃氣虛胸膈痞脹痰停作嘔飲食少思者宜

半夏茯苓湯若因怒動肝火尅制脾土而致前症者  
宜六君子加柴胡山梔枳殼脾胃虛寒者六君子加  
木香砂仁內半夏治脾胃虛諸症尤當用

一紫蘇順氣飲若胎動不安元氣無虧者宜暫用之若  
因脾氣虛弱者宜六君子加紫蘇枳殼鬱結傷脾者  
宜四君子加柴胡山梔蘇梗鬱怒傷肝脾者六君子  
加柴胡黃芩枳殼

一四物膠艾湯若內熱胎痛下血不止者宜暫用之若

因肝經風熱而下血者用防風子芩丸若因肝火血熱宜加味逍遙散若脾經鬱火宜加味歸脾湯若因肝氣虛陷宜補中益氣湯倍加升麻柴胡若因事下血者宜八珍湯加膠艾

一黃芩白朮二味為安胎之藥若脾胃蘊熱中氣無虧者宜暫用之凡屬脾胃虛痞飲食少思或泄瀉嘔吐面色痿黃肢體倦怠者宜六君子湯

一達生散若厚味安逸者宜用若芻蕘勞役者不宜用

一 妊娘腹痛須驗其面赤舌青者此胎已死用平胃散加朴硝三錢下之下後隨用八珍大補等湯調補之若唇口俱青吐出痰沫者子母俱死也若面舌俱青者母死子活產下亦死

一 小續命湯若外中風邪腰背反傷筋脈痠癢者宜暫用之若產後失血過多陽火熾盛虛熱生風者宜八珍湯加釣藤丹皮如不應當用四君子湯加當歸丹皮鈎藤若陽氣脫陷者宜補中益氣湯如不應急加

附子氣虛血敗者宜用十全大補湯如不應急加附子亦有生者

一澤蘭湯若產後惡露腹痛胸滿少氣宜用之若體倦面黃食少少寐而惡露不止宜加味歸脾湯若氣血虛損而惡露上攻先用失笑散後用八珍湯禁用黑神散奪命丹之類

一產後口鼻起黑氣鼻衄者是胃氣虛敗而血滯也急用二味參蘇飲多有生者

宮人孀婦治驗

一婦人年三十有七早孀居兩腿骨作痛晡熱體倦月經不調或發寒熱數年矣一日頸項兩側結核兩脇脹痛此係肝經鬱火而成也先用小柴胡湯合四物數劑肝症頓愈又用加味道遙散加澤蘭乳香沒藥三十劑血症漸痊再用加味歸脾湯年餘而安

一孀婦兩腿作痛或用除濕化痰等藥遍身作痛而無定處此血症也不信乃服流氣飲之類而歿

一放出宮人年四十餘臀腿內股作痛晡熱口乾月經不調此係肝經血少不能養經絡而然也宜加味逍遙散加澤蘭葉五十帖諸症稍緩又以歸脾湯二百餘劑而痊

一放出宮人臀腿腫痛內熱晡熱惡寒體倦咳嗽胸痞月經過期而少彼以為氣毒流注服清熱理氣之劑益甚此肝經瘀血停留所致蓋肝經上貫膈布脇肋循喉嚨下循膈內脇繞陰器抵少腹主治之法但當

補其所不勝而制其所勝補者脾也制者肝也經曰  
虛即補之實則瀉之此定法也彼不信仍服前藥遂  
致不起

婦人症與男子無以異也所異者月水胎產崩帶等症  
耳今惟蒐其異與赤紫者集為一門餘雜症治同男  
子當於雜症門中求之茲不重錄

調經門

岐伯曰女子七歲腎氣盛齒更髮長二七而天癸至任

脈通太衝脈盛月事以時下天謂天真之氣癸為壬  
癸之水故云天癸也然衝為血海任主胞胎二脈流  
通經血漸盈應時而下常以三旬一見以像月盈則  
虧也若遇經行最宜謹慎否則與產後症相類若經  
行惱怒勞役則氣血錯亂經脈不行多致癆瘵等疾  
若逆於頭面肢體之間則重痛不寧若怒氣傷肝則  
頭暈脇痛嘔血而瘰癧癰瘍若經血內滲則竅穴淋  
瀝無已然此六淫外侵而變症百出犯時微若秋毫

成患重如山岳可不畏哉

褚澄遺書曰飲食五味養骨髓肌肉毛髮男子為陽陽中必有陰陰中之數八故一八而陽精升二八而陽精溢女子為陰陰中必有陽陽中之數七故一七而陰血升二七而陰血溢皆飲食五味之實透也方其升也智慮開明齒牙更始髮黃者黑筋弱者強暨其溢也凡充身體手足耳目之餘雖針芥之厯無有不下凡子形肖父母者以其精血嘗於父母之身無所

不厯也是以父一肢廢則子一肢不肖其父母一目  
虧則子一目不肖其母然雌鳥牝獸無天癸而成  
胎何也鳥獸精血往來尾間也精未通而御女以通  
其精則五體有不滿之處異日有難狀之疾陰已痿  
而思色以降其精則精不出而內敗小便澁而為淋  
精已耗而復竭之則大小便牽痛愈痛即愈便愈便  
即愈痛女人天癸既至十年無男子合則不調未踰  
十年思男子合亦不調不調則舊血不出新血悞行

或漬而入骨或變而為腫後雖合而難子合多則滲枯虛人產衆則血枯殺人觀其精血思過半矣

夫血者水穀之精氣也和調五臟洒陳六腑男子化而為精女人上為乳汁下為經水故雖心主血肝藏血亦皆統攝於脾補脾和胃血自生矣凡經行之際禁用苦寒辛散之藥飲食亦然

王子亨方論曰經者常候也謂候其一身之陰陽愆伏知其安危故每月一至太過不及皆為不調陽太過

則先期而至陰不及則後時而來其有乍多乍少斷絕不行崩漏不止皆由陰陽衰盛所致故曰血氣和平則樂有子和則陰陽不爭月水以時下也

薛氏曰經云脾統血肝藏血婦人多因恚怒傷肝鬱結傷脾所致當從二經為主而參以前論治之

產寶方序論曰大率治病先論其所主男子調其氣女人調其血氣血者人之神也然婦人以血為基本苟能謹于調護則血氣宣行其神自清月水為期血凝

成孕若脾胃虛弱不能飲食榮衛不足月經不行肌膚黃燥面無光澤寒熱腹痛難於子息或帶下崩漏血不流行則成瘕症

經水或紫或黑論

丹溪曰經水者陰血也陰必從陽故其色赤稟火色也血為氣之配氣熱即熱氣寒即寒氣升則升氣降即降氣凝則凝氣滯則滯氣清則清氣濁即濁往往見有成塊者氣之凝也將行而痛者氣之滯也來後作

痛者氣血俱虛也色淡者亦虛也而有水混之也錯經妄行者氣之亂也紫者氣之熱也黑者熱之甚也今人但見其紫者黑者作痛者成塊者率指為風冷而行溫熱之劑則禍不旋踵矣良由病原論月水諸病皆曰風冷乘之宜其相習而成俗也或曰黑北方水色也紫淡於黑非冷而何予曰經云亢則害承乃制熱甚者必兼水化所以熱則紫甚則黑也况婦人性執而見鄙嗜慾加倍臟腑厥陽之火無日不起非

熱而何若曰風冷必須外得設或有之蓋千百一二者也

治經水紫黑為熱例

海藏四物芩連湯 治經水如黑豆汁

四物湯

四兩

黃芩

黃連

各一兩

為末醋糊為丸服

丹溪治月水黑口渴倦怠脈不勻似數

黃柏

炒

黃芩

各三錢

甘草

二錢

赤芍藥

香附

各半兩

右醋糊丸白湯下五六十丸

一婦二十歲月水二月不行忽行小腹痛有塊血紫色

白芍

白朮

陳皮

各半兩

黃芩

川芎

木通

各二錢

甘草

五分

右水煎服

一婦氣滯血澁脈不瀉經不調或前或後紫色兩大腿外臃麻木或時痒而生瘡大便秘滯

火麻仁

桃仁

芍藥

各二兩

枳殼

葳靈仙

白朮

歸頭

訶子肉

生地

陳皮

各五錢

大黃

煨七錢

為末粥丸梧子大白湯下五六十丸

調經之劑

局方四物湯

治衝任虛損月水不調臍腹痞痛

當歸

川芎

白芍藥

熟地黃

各等分

水煎服

逍遙散

治血虛煩熱月水不調臍腹脹痛潮熱咳嗽

炙甘草

五分

當歸

茯苓

白芍

白朮

柴胡

各一錢

右加薄荷葉生薑水煎服

膠艾湯

治勞傷血氣衝任虛損月水過多淋瀝不斷

阿膠

炒

川芎

炙甘草

各五分

當歸

艾葉

炒各一錢

熟地

白芍

各二錢

水煎服

溫經湯

婦人血海虛寒月水不利遠臍疼痛

桂枝桃仁湯萬病凡皆可用

當歸

川芎

芍藥

桂心

丹皮

莪朮

各五分

人參

甘草

牛膝

各一錢

水煎服

丹溪加味四物湯調經例

經候過而作痛血氣俱虛也宜本方對四君子

將來而痛者血實也本方加桃仁黃連香附

經水不及期者血熱也本方加黃連

過期者血少也本方加參朮有痰加半夏陳皮

過期紫黑有塊者血熱也必作痛加香附黃連

過期而淡色者痰多也芎歸二味入二陳湯

紫色成塊者熱也本方加黃連柴胡

肥人不及日數而多痰者乃血虛有熱本方加香附  
南星半夏黃連白朮

瘦人血枯經閉者本方加桃仁紅花或越鞠丸

#### 四物加減調經例

經水微少漸漸不通手足煩痛肌漸瘦生潮熱脈微  
數本方去川芎地黃加澤蘭葉三倍甘草半分

經水過多本方去熟地加生地

經行身熱脈數頭昏本方加黃芩柴胡各半兩  
經行微少或脹或疼四肢疼痛加玄胡沒藥  
經候不調心腹疔痛只用芎歸二味名君臣散  
元戎加味四物湯

氣充經脈故月事頻併臍下多痛本方加芍藥  
經欲行臍腹絞痛本方加玄胡檳榔苦練木香  
經水過多本方加黃芩白朮  
經水澁少本方加葵花紅花

經水適來適斷或往來寒熱宜先服小柴胡去寒熱  
後以四物湯和之

簡易當歸散 經候不勻或三四月不行或一月再至  
或天癸已過期經脈不調

川歸 白芍 川芎 黃芩 白朮 山茱萸肉

各半兩

一兩半

右為末每服空心溫酒調二錢日三服

寶鑑生地黄丸 治婦人血實厥陰脈弦而長惡風體

倦乍寒乍熱面赤心忪或時自汗如傷寒狀宜服抑陽藥

生地

二兩

柴胡

秦艽

黃芩

各半兩

芍藥

一兩

右為末蜜丸梧子大烏豆湯吞三四十丸日三服

薑黃散

治血臟久冷月水不調臍腹刺痛

當歸

丹皮

玄胡

各二兩

芍藥

三兩

川芎

紅花

桂

心

莪朮

各一兩

川薑黃

四兩

右為末每服一錢酒水同煎服

理氣之劑

澹寮煮附丸 經候不調血氣刺痛腹脇膨脹頭暈惡

心崩漏帶下並宜服之

香附子

擦去毛米醋浸一日  
磁器煮醋盡炒乾

右醋糊為丸梧子大每服五十丸淡醋湯下

艾附丸 治同前

艾葉

四兩

川歸

二兩

香附子

一斤

照上製為丸服亦同

嚴氏抑氣散 婦人氣盛於血變生諸症頭暈膈滿

香附

四兩

茯神

炙甘草

各一兩

陳皮

二兩

右為末每食遠沸湯調下二錢

正氣天香散 治婦人一切氣氣上湊心心胸攻築脇

肋刺痛月水不調

白烏藥

二錢

香附

八錢

陳皮

蘇葉

各一錢

乾薑

半錢

右分二帖水煎服

丹溪治一婦年四十八因有白帶口渴月經多初血黑

色後來血淡倦怠食少臍上急

白朮

半錢

紅花

許豆

陳皮

錢一

木通

黃芩

各五

縮砂

炙甘草

各三分

枳殼

五分

白芍

錢一

水煎吞保和丸三十丸抑青丸二十九

經水過多

黃芩

炒

芍藥

炒各

黃柏

炒三

龜板

炙一

香附

二錢

椿

根白皮

半錢

酒糊為丸白湯吞五六十丸

一婦脈弦而大不數形肥初夏倦怠月經來時多此稟受弱氣不足以攝血故行多也

黃芪 陳皮

各一錢

白朮

錢半

人參

五分

炙甘草

三分

水煎服

四物加熟地當歸湯 治經水少而色和

四物湯

四兩

熟地

當歸

各一兩

丹溪抑氣丸

臨經之時腹痛以四物湯加玄胡索陳

皮丹皮甘草

痛甚以豆淋酒下

痛輕以童便香

附八條芩為丸

又一婦年四十月水不調行時腹痛行後又有三四淋  
瀝皆穢水口渴面黃倦怠無力

白朮

一兩

歸身尾

六錢

陳皮

七錢

黃連

三錢

木通

黃芪

黃

芩

各二錢

炙甘草

一錢

分八帖水煎吞五靈丸四十粒

桂枝桃仁湯 經前腹痛不可忍

桂枝

芍藥

生地

各二錢

桃仁

四枚

甘草

一錢

薑三片棗一枚水煎服

又方

當歸 玄胡索

每服三錢薑三片水煎稍熱服

本事方 治婦人月經壅滯每發心腹臍疔痛不可忍  
及治產後惡露不快血上搶心迷悶不省人事氣絕  
欲死者琥珀散

京三稜 蓬莪朮 赤芍藥 劉寄奴 牡丹皮

熟地黄 官桂 真蒲黃 菊花 當歸

各一兩

右前五味用烏豆一升生薑半斤切片米醋四升  
同煮豆爛為度焙乾入後五味同為末每服二錢  
溫酒調下空心食前服一方不用菊花蒲黃用烏  
藥玄胡索亦佳 予家之秘方也若是尋常血氣  
痛只一服產後血衝心二服便下常服尤佳予前  
後救人急切不少此藥亦宜多合以救人

交加散 治營衛不和月經湛濁逐散惡血腹痛經血

諸疾並皆治之

生薑

二斤

生地

二斤

味製

白芍藥

當歸

桂心

各一

紅

花

炒無惡血不用

沒藥

另研各半兩

蒲黃

隔紙炒

玄胡索

醋紙包用布擦去皮

各一兩

右將地黃汁炒生薑滓薑汁炒地黃渣各焙乾用

諸藥為細末每服三錢溫酒調下 若月經不依

常蘇木煎酒調下 若腰痛砂糖酒調下

交加地黃丸 治婦人經不調血塊氣痞肚腹疼痛

生地

老薑

各一斤

玄胡

當歸

川芎

芍藥

各二兩

明沒藥

木香

各一兩

桃仁

去皮尖

人參

各半兩

香附

半斤

右為末先以薑汁浸地黃渣地黃汁浸生薑渣晒乾皆以汁盡為度共十一味作一處晒乾研為末醋糊為丸空心以薑湯下

一婦患經血紫黑一月二次行不思食口苦時發熱

麥冬

歸身

白芍

陳皮

白朮

各一兩

人參

地

黃 茯苓

各半兩

木通

三錢

生甘草

一錢

右分十帖食前熱飲下抑青與點各十五丸

益母草膏 益母草未結子時採來搗汁熬膏每用半  
杯和酒或薑汁調服大治汚血及月經不調

肥人不及期而多痰者血虛有熱南星白朮蒼朮黃連  
香附川芎作丸服

婦人血脈不調往來寒熱狀如勞倦

川歸 川芎 甘草 黃芪 官桂 熟地 白

朮 白芍

各二錢

柴胡

阿膠

各半兩

右每服五錢棗一枚水煎空心溫服為末白湯調  
下亦得常服則無帶下極調血脈養子宮終身無  
病

薛氏曰有脾經血燥而經先期者加味逍遙散 脾經  
鬱火先期者歸脾湯 肝經怒火而先至者加味小  
柴胡湯 血分有熱而先至者加味四物湯 勞役  
火動補中益氣湯 有脾經血虛而後至者人參養  
榮湯 肝經血少而後至者六味地黃丸 氣虛血

弱者八珍湯蓋血生于脾土故云脾統血凡血病當用苦甘之劑以助陽氣而生陰血也

經行臍腹痛甚以桃仁桂枝湯一劑而瘥

經行腹先痛用局方七氣湯送來復丹局方積氣丸瘥

癖癥瘕諸氣亦效

丹參丸 調經養血

金陵一家專製此與四製杜仲丸兩京甚重此二藥

丹參

淨四兩酒浸一宿日晒乾

大川芎

一兩半

川歸身

酒浸二兩淨

天台

烏藥

一兩香附

三兩童便浸炒七次只用淨末一兩

右為末煉蜜為丸梧子大每空心酒吞七十丸

經水當止不止

婦人四十九歲已後天癸當住每月却行或過多不止  
乃血熱也宜芩心丸

黃芩心枝條二兩米泔浸七日炙乾又浸又炙如此  
七次為末醋丸梧子大每服七十九空心溫酒送下  
日三

良方曰婦人月水不斷淋瀝腹痛或因勞損氣血而傷

衝任或因經行而合陰陽以致外邪客於胞內滯於血海故也但調養元氣病邪自愈若攻其邪則元氣反傷矣

薛氏曰前症若是鬱結傷脾用歸脾湯恚怒傷肝逍遙散肝火妄動加味四物湯脾氣虛弱六君子湯元氣下陷補中益氣湯熱傷元氣加麥冬五味黃柏炒黑

許學士云經脈過期不及腰腹疼痛或七七數盡而月經仍下者宜用簡易當歸散治之方見調經氣虛者

去黃芩加桂心一兩

黃芩湯 治經血不止

方出  
崩

居經

婦人月水當三旬一見今三月始一至名曰居經脈經曰少陰脈微而遲微則無精遲則陰中寒瀯即血不來此為居經三月一來

脈經曰婦人年已五十一旦而清血二三日不止何以治之師曰此婦人前絕生經水不下今反清血此為

居經不須治當自止經水下常五日止者五日愈

月經不通

出婦人良方

婦人月水不通或因醉飽入房或因勞役過度或因吐血失血傷損肝脾但滋其化源其經自通若小便不利若頭眩痛腰背作痛足寒時痛久而血結于內變為癥瘕若血水相併脾胃虛弱壅滯不通變為水腫若脾氣衰弱不能制水水漬肌肉變為腫滿當益其津液犬補脾胃方可保生

東垣曰經閉不行有三婦人脾胃久虛形體羸弱氣血俱衰而致經水斷絕不行或病中消胃熱善食漸瘦津液不生夫經者血脈津液所化津液既絕為熱所燥肌肉漸瘦時見渴燥血海枯竭病名曰血枯經絕宜瀉胃之燥熱補益氣血經自行矣此症或經適行而有子子亦不安為胎病者有矣

或心包脈洪數躁作時見大便秘澀小便雖清不利而經水閉絕不行乃血海乾枯宜調血脈除包絡中

火邪而經自行矣

或因勞心心火上行月事不來者胞脈閉也包脈者屬心而絡于包中今氣上迫肺心氣不得下通故月事不來宜安心補血瀉火經自行矣

潔古曰女子月事不來者先瀉心火血自下也內經曰二陽之病發心脾有不得隱曲故女子不月其傳為風消王啟玄註曰大腸胃熱也心脾受之心主血心病即血不流脾主味脾病即味不化味不化則精不

足故其病即不能隱曲脾土已虧即風邪勝而氣愈消也又經曰月事不來者胞脈閉也宜先服降心火之劑後服局中五補丸後以衛生湯治脾養血也

五補丸

補諸虛安五臟堅骨髓養精神

熟地

人參

牛膝

白茯苓

地骨皮

各等分

右煉蜜丸梧子大每服五十丸溫酒空心服

衛生湯

當歸

白芍

各二兩

黃芪

三兩

甘草

一兩

每服五錢水煎空心服如虛者加人參一兩

按東垣潔古治血枯之法皆主於補血瀉火也補血者四物之類瀉火者東垣分上下中故火在中則善食消渴治以調胃承氣之類火在下則大便秘澀治以玉燭之類玉燭者四物與調胃承氣等分也火在上則得于勞心治以芩連及三和之類三和者四物涼膈當歸等分也潔古先服降心火之劑者蓋亦芩連三和玉燭之類後服五補衛生者亦補氣之劑

也

黃帝曰有病胸脇支滿者妨于食病至則先聞腥臊臭  
出清液先唾血四肢清目眩時時前後血病名為何  
何以得之岐伯曰病名血枯此得之少年時有所大  
脫血若醉入房中氣竭肝傷故月事衰少不來也帝  
曰治之奈何岐伯曰以四烏鰂骨一蘆茹二味并合  
之丸以雀卵大如小豆以五丸為后飯飲以鮑魚汁  
利腸中及傷肝也

王啟玄註云烏鰽魚骨主血閉蘆茹主散惡血雀  
卵主血痿鮑魚主瘀血河間宣明論方烏鰽魚骨  
蘆茹各等分雀卵不拘數和丸小豆大每服五丸  
至十九煎鮑魚湯下食後日三服壓以美膳

養生必用論曰女子十四天癸至任脈通月事以時于  
是有子天癸者物之自然月者以月至經者有常也  
其來過與不及皆謂之病若榮血虧損不能滋養百  
骸即髮落面黃羸瘦燥熱燥氣盛則金受邪金受邪

則為咳為嗽為肺癰為肺痿必矣但助胃壯氣則榮血生而經自行須慎飲食調七情保神氣庶可得生若暴怒氣逆經閉不行當用行氣破血之劑

劉宗厚曰榮者水穀之精氣和調于五臟洒陳于六腑乃能入于脈也源源而來生化于脾總統于心藏受于肝宣布于肺施泄于腎灌溉一身目得之而能視耳得之而能聽手得之而能握足得之而能步臟得之而能液腑得之而能氣注之于脈少則濡充則實

常以飲食滋養則陽生陰長變化而為血諸經恃此則百脈長養耗竭則百脈空虛可不慎哉若陰氣一傷變症百出妄行于上即吐衄衰涸於下則癰閉血滲腸間則為腸風陰虛陽搏即為崩濕蒸熱瘀則為滯下熱極腐化即為膿血火極似水則血紫黑熱勝于陰發為瘡瘍濕滯于血則為痛痒癰疹蓄之在上則善忘蓄之在下則善狂

寇宗奭曰夫人之生以氣血為本人之病未有不先傷

其氣血者若室女童男積想在心思慮過度多致勞損男子即神色消散女子即月水先閉且心病即不能養脾故不嗜食脾虛即金虧故發嗽腎水絕則木氣不榮而四肢乾痿故多怒髮髮焦筋骨痿若五臟傳遍則死苟或自能改易心志用藥扶持庶可保生切不可用青蒿蚤蟲等涼血行血宜栢子仁丸澤蘭湯益陰血制虛火也按內經五穀入于胃其糟粕津液宗氣分為三隧故宗氣積于胸中出于喉嚨以貫

心脈而行呼吸營氣者泌其津液注之于脈化以為血以營四末內養五臟六腑若服苦寒之劑復傷胃氣是犯生生之戒必致於不起也

薛氏曰按經水陰血也屬衝任二脈上為乳汁下為月水其為患有因脾虛而不能生血者有因脾鬱而血不行者有因胃火而血消燥者有因脾胃損而血少者有因勞傷心而血少者有因怒傷肝而血少者有因腎水少不能生肝而血少者有因肺氣虛不能行

血者治療之法若脾虛而不能行者調而補之脾鬱  
而不行者開而補之胃火而不行清而補之脾胃損  
而不行溫而補之勞傷心血而不行逸而補之怒傷  
肝而不行和而補之肺氣虛而不行補脾胃腎虛而  
不行補脾肺經云損其肺者益其氣損其心者調其  
營衛損其脾者調其飲食適其寒溫損其肝者緩其  
中損其腎者益其精皆當審而治之

蕭氏曰經云氣上迫肺則心氣不得下通故月事不來

今用連朴之類導痰降火使氣不上迫于肺故心氣下通而月事來也

丹溪治一婦久瘡食少經閉兩手無脈每日與三花神祐丸十餘粒津嚥之月餘食進脈出又半月脈愈又一月經行亦此意也予嘗體此治陳婦二十歲形肥痞塞不食每日卧至未牌喫一盞粥粥後必吐水半碗復卧經閉三月前時忽通黑色脈之辰時寸關滑皆有力午後關滑寸不滑詢之因乘怒飲食而致遂

以白朮一兩半厚朴黃連枳實各一兩半夏茯苓陳  
皮山查人參滑石各八錢縮砂香附桃仁各半兩紅  
花二錢分十帖各入薑汁三匙日進之間三日以神  
祐九神秘沉香丸微下之至十二日吐止食漸進四  
十日平復如故又汪氏年三十餘形瘦亦痞不食吐  
水經不通以前方加參朮歸為君煎熟入竹瀝半盞  
薑汁服之但不用神祐丸下亦平復若咳嗽寒熱而  
經閉者當于咳門求之

張子和曰凡月事不來用茶調散吐之次用玉燭散芎歸湯三和湯桂苓白朮散之類降心火益腎水開胃進食分陰陽利水道之藥也

一婦月事不行寒熱往來口乾頰赤飲食少旦暮間咳一二聲諸公皆用蠶蟲水蛭乾漆礪砂芫青紅娘子沒藥血竭之類惟予不然古方雖有此法柰病人服之臍腹必發痛飲食不進乃命止藥飲食稍進內經曰二陽之病發心脾心受之則血不流故不月既心

受積熱宜抑火升水流濕潤燥開胃誘食乃涌出痰  
一二升下泄水五六行濕水上下皆去血氣自然喘  
流月事不為水濕所隔則依期而至矣亦不用蟲  
水蛭有毒之藥如用之則月經縱來小洩反閉他症  
生矣凡精血不足宜補之以食大忌有毒之藥偏勝  
而致天關多矣

一婦三十四歲經水不行寒熱往來面色痿黃唇焦頰  
赤時咳二三聲問其所服之藥黑神散烏金丸燒肝

散四物湯鼈甲散建中湯寧肺散鍼灸千百轉劇家  
人意倦不欲求治予憫之先涌痰五六升午前涌畢  
午後食進餘症悉除後三日復輕涌之又去痰一二  
升食益進不數日又下通經散瀉訖一二升後數日  
去死皮數重小者如麩片大者如葦膜不一月經水  
自行神氣大康

室女月水不通 用雄鼠屎一兩燒存性為細末空心  
溫酒調下一錢神效

仲景礬石丸 婦人經水閉不利臟堅癖不止中有乾

血下白物

礬石

枯三錢

杏仁

二錢半

二味末之蜜丸棗核大內陰中劇者再內之

琥珀散 治心膈迷悶肚腹撮痛月信不通等疾

烏藥

二兩

當歸

蓬朮

醋煨各一兩

右為末溫酒調下二錢

萬病丸 月經瘀閉臍腹作痛及產後癥瘕等病

乾漆

炒烟出青  
白為度

牛膝

酒浸焙  
各一兩

為末生地黄汁一升砂器慢火熬膏丸梧子大每服二十九空心米飲下

紅花當歸散 經候不行腰膀重痛小腹堅硬

紅花 當歸尾 紫葳 牛膝 炙甘草 蘇木

各二

錢

白芷

桂心

各一錢半

赤芍

炒一兩

劉寄奴苗

五錢

為末酒調服三錢

栢子仁丸

栢子仁

炒另研

牛膝

酒洗炒

卷栢

各半兩

澤蘭葉

一兩

右蜜丸 梧子大每服三十九空心米飲下

澤蘭湯

澤蘭葉

二錢

當歸

芍藥

各一錢炒

炙甘草

五分

水煎服

茯苓補心湯 治婦人心氣虛耗不能主血又不能制

乎肺金氣得以乘乎肝木肝既虧損則血不能藏漸

致精血枯涸月事不調此方專補心元之虛抑其肺

氣調和營衛滋養血脈 前方參蘇飲內除木香餘  
與四物湯對勻每服五錢以薑棗煎溫服 此方常  
進用以治宮娥多效

牛膝散 治月水不利臍腹作痛或小腹引腰氣攻胸  
膈

牛膝 桂心 赤芍炒 桃仁 玄胡索炒 川歸 丹

皮各一兩

右為末每服一錢酒調服或每服五錢水煎服

地黃通經丸 治月經不行或產後惡露臍腹作痛

熟地

四兩

蛭蟲

去頭翅炒

水蛭

糯米同炒黃去米

桃仁

去皮尖各五十枚

右煉蜜丸梧子大每服五七丸空心酒下

牡丹皮散 婦人月水不利臍腹疼痛

丹皮

大黃

炒各一兩

赤芍

生地

桃仁

川歸

桂

心

赤茯苓

白朮

各七錢半

石葦

去毛

木香

各半兩

右每服五七錢薑三片水煎空心服

本事通經丸

婦人室女月水不通疼痛或成血瘕

桂心

青皮

去白

大黃

炒

乾薑

川椒

川烏

乾漆

莪朮

川歸

桃仁

各等分為末先將四錢用米醋熬成膏和餘末調勻搗干杵丸如梧子大晒乾每服二十九粒淡醋湯下加至三十粒溫酒亦得

厚朴湯

治月水不通屢試有驗

因氣滯痞嘔結痰在上寒熱

厚朴

薑汁炙香

切細濃煎去渣空心服不過三四劑瘥

丹溪積痰傷經不行夜則妄語

瓜蒌子

一兩

黃連

五錢

吳茱萸

一錢半

桃仁

五十枚

紅麴

二錢

縮

砂

三兩

山查末

薑汁飪餅糊為丸

軀肥脂滿經閉者導痰湯加芎連不可服地黃如用以

薑汁炒過

即二陳加枳實黃連是也

一婦年二十餘兩年經閉食少乏力

黃連

二兩

白朮

一錢半

陳皮

各一錢

滑石

各一錢

黃芩

半兩

木通

三分

桃仁

十二枝

炙甘草

少許

水煎服

瘀血鬱滯經閉或臨經時腰疼腹痛宜四物加紅花桃

仁莪朮玄胡香附木香發熱加黃芩柴胡

瘀血作痛經閉不行九藥方

香附

醋煮四兩

瓦楞子

煨二兩醋煮一晝夜

桃仁

二兩

丹皮

大黃

蒸

川歸

各一兩

川芎

紅花

各半兩

為末飭餅丸梧子大空心溫酒下三五十丸

經水過期不行

玄胡索

錢一

香附

枳殼

各五分

為末杜牛膝汁半鍾空心調服

當歸散 治經脈不通

川歸

川山甲

炒灰

蒲黃

炒各半兩

辰砂

錢一

麝香

少許

右為末酒調服二錢

菖蒲丸 血積心脾作痛

九節菖蒲

六兩

吳茱萸

炒

香附子

各四兩

右為末醋打神麴糊為丸梧子大每服五十丸薑湯下

沒藥散 血氣不行心腹疼痛或走注痛月經不調發熱晡熱並宜用之

紅花 沒藥 川歸 玄胡

炒

右各等分為末每服二錢童便酒調下

歲靈仙散 凡冷氣滯血少小腹疼痛或經行遇怒腹脹痛宜用之

葳靈仙

一兩

川歸

沒藥

木香

桂心

各五錢

為末每服一錢熱酒調下

當歸散 凡血積小腹痛或因氣逆月經不行肚腹作痛

川歸

炒

赤芍

沒藥

枳殼

炒

劉寄奴

玄胡

各等分為末每服一錢酒調下

加味建中湯 血海受寒小腹作痛

桂心

半兩

白芍

一兩

炙甘草

二錢半

吳茱萸

當歸

玄胡

丹皮

錢各五

每服五錢加薑棗水煎食前服

滋血湯

婦人血熱氣虛經候澁滯不通肢體麻木肌

熱生瘡渾身痒倦將成癆瘵不可妄服藥餌宜以此

滋養自能通利

馬鞭草

荆芥穗各四兩

桂心

枳殼

川芎

川歸

丹皮

赤芍各一兩

每服五錢烏梅一枚水煎食前服

如有此症服

半月經脈自通百病皆愈 出適宜方

崩

生生子曰崩者謂傾陷之勢而不可遏俗曰血山崩謂血暴下如山之崩壞也又曰血海敗蓋衝任二脈為血之海附于陽明陽明者土也土位乎中故又曰崩中

內經陰陽別論云陰虛陽搏謂之崩東垣曰婦人脾胃虛損致尺部脈沉細而數或沉弦而洪大有力寸關

脈亦然皆由脾胃有虧下陷于腎與陰火相合濕熱下迫經漏不止其色紫黑如夏腐肉之臭中有白帶者脈必弦細寒作于中中有赤帶者其脈洪數疾熱明矣必腰痛或臍下痛臨經欲行先見寒熱往來兩脇急縮兼脾胃症出見或四肢困熱心煩不得眠心下急宜大補脾胃而升舉血氣可一服而愈或人故貴脫勢人事疎少或先富後貧心氣不足其火大熾旺于血脈之中又致脾胃飲食失節火乘其中形質

肌肉容顏似不病者此心病不行於診故脾胃症顯  
矣故經水不時而下或暴下不止治當先說惡死之  
言勸諭令拒死而心不動以大補氣血之藥補養脾  
胃微加鎮墜心火之藥治其心補陰瀉陽經自止矣  
痿論云悲哀太甚則胞絡絕胞絡絕則陽氣內動發  
則心下崩數洩血也故本病曰大經空虛發則肌痺  
傳為脈痿此之謂也

良方論曰婦人崩中由臟腑傷損衝任血氣俱虛故也

衝任為經脈之海血氣之行外循經絡內營臟腑若無傷損則陰陽和平而氣調適若勞動過多致臟腑俱傷而衝任之氣虛不能約制其經血故忽然暴下或由陰陽相搏為熱所乘攻傷衝任血得熱則流散甚者致于昏悶其脈數小則為順洪大為逆大法當補脾胃為主

薛氏曰經云陽絡傷則血外溢陰絡傷則血內溢又云脾統血肝藏血治法前症因脾胃虧損不攝血歸元

用六君子加芎歸柴胡若肝經之火而血下行用奇效四物湯或四物加柴梔苓朮若肝經風熱而血妄行用加味逍遙散或小柴胡梔芍丹皮若怒動肝火而血沸騰亦用前藥若脾經鬱結而血不歸經用歸脾加柴梔丹皮若悲傷胞絡而血下崩用四君加柴梔升麻故東垣先生云凡下血症須用四君以收功厥言旨哉若大吐血母以脈論當急用獨參湯救之若潮熱咳嗽脈數乃元氣虛弱假熱之脈尤當用人

參溫補此等症候無不由脾胃先損故脈洪大察其  
有胃氣能受補則可救苟用寒涼止血之藥復傷脾  
胃反不能攝血歸源是速其危也

丹溪曰血崩亦有因涎鬱胸中清氣不升故經脈壅遏  
而降下非開涎不足以行氣非氣升則血不能歸隧  
道此論血泄之義甚明蓋開胸膈濁涎則清氣升清  
氣升則血歸隧道不崩矣故其証或腹滿如孕或臍  
腹疼痛或血結成片或血出即快止即悶或臍上動

其治法宜開結痰行滯氣消瘀血

又曰勞動過傷臟腑衝任之氣虛不能約制其經血故  
忽然而下謂之崩中暴下當宜大補氣血之藥舉養  
脾胃微加鎮墜之劑治其心補陰瀉陽經自止矣  
急即治其標用白芷湯調百草霜末甚者棕櫚灰後  
用四物湯加炒乾薑調理因勞者用參耆帶升補  
藥因寒者用乾薑因熱者用黃芩崩過多者先  
以五靈脂末一服當分寒熱蓋五靈脂能止能行

紫色成塊者為熱四物湯加黃連之類 崩中用香  
附白芷九服氣虛血虛者皆以四物湯加參芪 漏  
下為熱而虛四物加黃連 崩中白帶用椒目末又  
用石灰炒去灰為末茜草少許粥九服 經血逆行  
或血腥或唾血或吐血用韭菜汁服效

治血崩血瘕或經行產後心腹脇痛五靈脂炒烟盡為  
末每服一錢溫酒調或用三錢水酒童便煎服

治風熱血崩荆芥穗燈火燒焦為末每服三錢童便調

服又治產後昏暈俱妙

獨聖散 治肝經有風血崩

防風

去叉  
蘆

為末每服二錢空心食前酒煮白麴清飲調下極

驗

神應散 治血虛內熱血不歸經而崩

桂心

燒存  
性

為末每服一二錢米飲調下

又方 陳槐花一兩百草霜半兩為末每服一二錢燒紅鐵秤鎚淬酒調下

簡易黃芩湯 崩中下血陽乘陰經水沸溢

黃芩

為末每一二錢燒秤鎚淬酒調下

或用此酒吞  
芩心丸亦妙

伏龍肝散 治氣血勞傷衝任經虛血非時崩下臍腹疼痛脈遲弱食或少或赤白帶下

伏龍肝

赤石脂

麥冬

各一兩

炙甘草

半兩

川芎

三兩

當

歸 乾薑

七錢半

桂心

半兩

艾葉

三兩

熟地

二兩

每服六錢棗一枚水煎服

羅氏備金散 治婦人血崩不止

香附子

炒四兩

歸尾

一兩二錢

五靈脂

炒一兩

空心酒調服五錢立效

本事方 治下血不止或成五色崩漏

香附子春去皮毛中斷之略炒為末每服二錢用清

米飲調下 此方徐氏傳其內人有是疾徧服藥不

效後服此遂愈須久服為佳亦治產後腹痛大是婦人仙藥常服益血調氣 大千方用醋煮出焙乾為末醋糊為丸梧子大每服五十九米飲送下 數墮

胎者此藥尤妙

前藥用乾荷葉濃煎湯調吞更佳

縮砂散 治血崩

縮砂仁不拘多少於新瓦上炒香為末米飲調下三錢

治血崩不止 五靈脂炒加當歸酒同煎或水酒童便

各半盞同煎服

又方 水煎五靈脂半乾去渣清再熬成膏入神麴末  
為丸梧子大空心溫酒下三五十丸便止

又方

鹿茸

醋炙

當歸

各二錢

蒲黃

炒半兩

為末酒調五錢日三

仲景桂枝茯苓丸 治婦人有癥在臍上動下血不止

桂枝

茯苓

桃仁

去皮

尖炒

芍藥

丹皮

去心

各等分

為末煉蜜為丸梧桐子大每服十九日三以止為

度

又婦人陷經漏下色黑 膠薑湯主之

即芍歸膠艾湯

芍藥

阿膠

甘草

各二兩

艾葉

當歸

各三兩

芍藥

四兩

熟地

右水五升清酒三升煮取三升去渣內膠令消盡

溫服一升日三不瘥更煮一料

一云加乾薑一兩

東垣益胃升陽湯 血脫益氣古人之法也先補胃氣

以助生長故曰陽生陰長諸甘藥為之先務舉世皆以為補氣殊不知甘能生血此陽生陰長之理也故先理胃氣人身之內穀氣為寶

黃芪

二錢

人參

嗽者去之

神麴

炒各一錢半

升麻

柴胡

各五分

白

朮

三錢

當歸身

甘草

炙

陳皮

一錢

生黃芩

二錢

暑之伏

金肺瀉盛

逆秋涼  
不用

右每服五錢如食漆再加之如食減於五錢內減一二錢不可多服水煎服一方有生地如腹痛

每服內加白芍二分中桂少許如口乾渴加葛根  
二分先服此益胃升陽湯不止却服後柴胡調經  
湯大舉大升之也

柴胡調經湯 治經水不止下皆鮮血頂筋急腦痛脊  
骨強痛不思飲食

羌活 獨活 藁本 升麻 蒼朮 葛根 當

歸 甘草 柴胡 紅花

炙各三分 各七分 許少

水煎稍熱服取微汗立止

又嘗治一老婦血崩不止流流不絕滿床皆血上床不得者三月矣腹滿如孕乃作虛挾痰積瘀血治之用四物四兩參朮各一兩甘草半兩以補虛香附三兩半夏兩半茯苓陳皮枳實砂仁玄胡各一兩以破瘀積汚血分二十帖每帖煎乾加乾荷葉側柏葉湯再煎服之服盡良愈今再不發如神

雲岐子栢黃散 療經血不止

黃芩

一兩二錢半

側柏葉

蒲黃

各一兩

伏龍肝

一兩

水二升煎取八合分為二服

又方 崩中不止結作血片如雞肝色碎爛

芎藭

一錢二分

阿膠

青竹茹

各八分

續斷

地榆

小蓟

根

各三分

當歸

六分

生地

伏龍肝

各一錢一分

水九盞煎三盞分三服

一婦經漏不止四物加黃連黃柏鹿角膠童便數劑而愈緣此婦素服不得參芪後又小產血崩不止亦以前劑進之而安

大全方 崩中下血不止小腹痛

白芍藥

酒炒  
二兩

側柏葉

微炒  
六兩

右水一升煎取六合入酒五合煎取五合空心分  
為二服 一方為細末酒調二錢 一方有鹿角  
膠等分酒調治白帶臍腹痛

治經血不止歌曰 婦人經血正淋漓 舊益蓮蓬燒  
作灰 熱酒一盃調八字 自然安樂更無疑

經驗方 百草霜二錢狗胆汁拌勻分作二服以當歸

酒調下

黃芩湯 治經血不止

黃芩

五

川歸

側柏葉

蒲黃

各四

艾葉

一分

生地

二錢

半

伏龍肝

二錢

生薑三片水煎服

經驗方 治血崩不止

右用黃連解毒湯加艾葉服無不效者

南岳魏夫人濟陰丹 治婦人血氣久冷無子數經墮

胎皆因衝任之脈虛損胞內宿挾疾病經水不時暴下不止月內再行或前或後或崩中漏下三十六疾積癥癖臍下冷痛小便白濁以上疾症皆令孕育不成以致絕嗣常服令人有孕及生子充實產後百日內常服能去百病去宿血生新血

木香

煨

茯苓

京墨

燒紅醋淬研末

桃仁

去皮尖炒各一兩

秦艽

炙甘草

人參

桔梗

炒

藁本

石斛

酒浸焙

蠶退紙

燒存性各二兩

乾薑

炮

牡丹皮

桂心

川歸

細辛

川

芎

各一兩半

川椒

去目炒出汗

山藥

各七錢半一方三兩

澤蘭葉

熟地

香附

炒各四兩

大豆黃卷

炒半升

蒼朮

米泔浸去皮炒八兩

糯米

炒一升

右為末蜜丸每兩分作六丸每服一九嚼細食前溫酒醋任下此藥用之累效血崩服之即止

向有經候不行者二年腹內一似懷孕時或鼓動但脈弦疾非妊脈耳遂令服至半劑下血塊一盂自後服盡經候竟調若經病久無子者服之即孕且生子充實但服至有孕便當住服或脾胃素弱

不宜用蜜丸則以醋煮薄麵糊為丸如梧子大每服五十九丸溫酒醋湯任下

赤白帶下

機要云赤者熱入小腸白者熱入大腸其本實熱冤結於脈不散故為赤白帶下也冤屈也結也屈滯而病熱不散先以十棗湯下之後服苦練丸大玄胡散調下之熱去濕除病自愈也

劉宗厚曰此論有餘之症也

良方論云婦人帶下其名有五因經行產後風邪入胞

門傳於臟腑而致之若傷足厥陰肝經色如青泥傷於手少陰心經色如紅津傷於手太陰肺經形如白涕傷於足太陰脾經黃如爛瓜傷足少陰腎經黑如衄血人有帶脈橫於腰間如束帶之狀病生於此故名為帶

生生子曰按此論前既云傷於肝則色青傷於心則色赤云云是五臟皆能令人帶下也抑何待於奇經之帶脈病而後然歟緣帶乃有形之病如衣

帶之狀所下之物亦必成條或成片而象之也雖有赤白之殊皆濕痰瘀血所致若局定指奇經帶脈之名而始名之為帶下得無太泥乎哉攷之難經二十九難曰奇經之為病何如云云帶之為病腹滿腰溶溶若坐水中滑伯仁註曰任脈起胞門行腹故病苦內結男為七疝女為瘕聚帶脈迴身一週故病如是觀乎是在任脈則有男女之分在帶脈則無男女之分據乎是則凡帶脈所生之病

乃男女均有之疾初非硬指帶脈之名為婦人今日所謂白物淫淫而下之帶也又按內經骨空篇曰任脈為病男子內結七疝女子帶下瘕聚亦是任脈主帶下而不以帶脈名帶下也故後之歷代諸公所治亦不泥於帶脈予故辯而明之庶臨症者而毋以名拘焉

劉宗厚曰按良方此論言風氣寒熱傷於諸臟致症似言外邪大抵此症多有本於陰虛陽竭營氣不升經

脈凝滯衛氣下陷精氣累滯於下焦奇經之分蘊積而成其病或醉飽房勞服食燥劑所致也白物如涕之狀故言帶者亦病形也經云帶脈為病而得名而白者屬氣赤屬血東垣舉脈訣曰崩中日久為白帶漏下多時骨木枯言崩中者始病血崩久則血少復亡其陽故白滑之物下流不止此可見未得全拘於帶脈矣詳病亦有濕痰流注於下焦或肝腎陰淫之濕勝或因驚恐而水乘土位濁液下流或思慕為筋

痿內經所謂二陽之病發心脾是也或餘經濕熱屈  
滯於少腹之下而病本殊則皆為氣血虛損營衛之  
精氣累治而成其病標一也前人立論殆盡病機則  
治法無定若戴人以帶下得兩手脈俱滑大而有力  
乃上用宣去痰飲下以導水丸泄濕熱繼以淡劑滲  
之此為瀉實也如其諸脈微細或沉緊而濡按之空  
虛或洪大而濡按之無力正為元氣不足陰虛筋痿  
虛極中寒等症東垣有補陽調經固真等例乃兼其

虛也丹溪先生治因濕痰下注用海石南星椿根皮之類較之前人下之而復吐以提其氣或發中兼補補中兼利燥中兼升發潤中兼益氣溫而兼收澁之例不同蓋病機有輕重淺深之異耳

仲景曰婦人帶下六極之病脈浮則為腸鳴腹滿緊則為腹中痛數則為陰中痒痛洪則生瘡弦則陰疼掣痛

又曰帶下有三門一胞門二龍門三玉門已產屬胞門

未產屬龍門未嫁女屬玉門

脈經問曰未出門女有三病何謂也師曰一病者經水初下陰中熱或有當風或有扇者二病者或以寒水洗之三病者或見丹下驚怖得病屬帶下

又問曰婦人年五十所病下痢數十日不止暮則發熱少腹裏急痛腹滿手掌熱唇口乾燥何也師曰此病屬帶下何以故曾經半產瘀血在少腹中不去何以知之其症唇口乾燥故知之當與溫經湯

內經曰脾傳之腎病名疝瘕少腹冤熱而痛出白一名  
白蠱當此之時可按可藥 啟玄子註曰出白洩出  
白液也蓋便濁白帶之類

許學士云凡婦人有白帶多致不產育速宜治之

衍義治帶下并腸有敗膿淋露不已腥穢殊甚遂至臍  
腹更增冷痛此蓋敗膿血所致卒無已期須以此排  
膿白芷一兩單葉紅蜀葵根二兩白芍藥白枯礬另  
為末各半兩同以蠟丸如梧桐子大空心及飯前米

飲下十九或十五丸俟膿盡仍別以補藥佐之

本事方 治下元冷赤白帶下不問遠年近日盡效

龍骨

五錢

舶上硫黃

三錢半

右為末每服半錢無灰酒下空心調服一日三服

伏龍肝散 治赤白帶下久不瘥肌瘦瘁黃

棕櫚

燒存性

伏龍肝

屋梁上塵

懸長者炒烟盡出火毒

右等分為末入龍腦麝香各少許每服二錢酒或

醋調服病十年者半年可安有人經年崩漏不止

諸藥不效脈濡微與此藥兼香礬丸服之即愈

# 香礬丸

白礬

四兩

香附子

二兩

黃狗頭骨灰

四兩

右為末粥丸梧子大每服三十丸

東垣補經固真湯 白文舉正室白帶常漏久矣諸藥

不效診得右尺極微其白帶下流不止脈經云崩中

日久為白帶漏下多時骨木枯言崩中者始病血崩

久則血少復亡其陽故白滑之物下流不止是本血

海將枯津液復亡乾枯不能滋養筋骨以本部行經  
為引用為使以大辛甘油膩之藥潤其枯燥而益津  
液以大辛熱之氣味補其陽道生其血脈以苦寒之  
藥泄其肺而救上熱傷氣以人參補之以微苦溫之  
藥為佐而益元氣名曰補經固真湯

柴胡

甘草

炙

陳皮

郁李仁

另研

生黃芩

另

人

參

乾薑

各二錢

白葵花

去萼

七朵

右除黃芩外以水二大盞煎至一盞七分再入黃

苓同煎至一盞空心熱服以早膳壓之

桂附湯 治白帶腥臭多悲不樂大寒

肉桂

錢一

大附子

錢三

黃柏

知母

各五分

如少食常飽有

時似腹脹加白芍藥

五分

如不思飲食加五味子

二十粒

如煩惱面上麻木如蟲行乃胃中元氣極虛加黃芪

錢一人參

七分

炙甘草

二分

升麻

五分

作一服水二鍾煎至一鍾食遠熱服

酒煮當歸丸

治頰疝白帶下注脚氣腰以下如在冰

雪中以火焙炕重厚綿衣蓋上猶寒不任冷之極也  
面白如枯魚之象肌如刀削消瘦之速也小便不止  
與白帶長流而不禁固自不知覺面白目青藍如菜  
色目眈眈無所見身重如山行步欹側不能安地腿  
膝枯細大便秘結口不能言無力之極食不下心下  
痞煩心懊懣不任其苦面停垢背惡寒小便遺而不  
知此上中下三陽真氣俱竭故噦嘔不止胃寒之極  
也其脈沉緊而濡按之空虛若脈洪大而澁按之無

力猶為中寒之症況按之空虛者乎按之不鼓是為陰寒之極也其空虛乃血氣俱虛之極也

當歸

一兩

茴香

半兩

黑附子

炮去皮臍

良薑

各七錢

右四味剉以好酒一升半煎至酒盡為度炭火焙乾為細末入後藥

炒黃鹽

丁香

各半兩

全蝎

三錢

柴胡

二錢

升麻根

木香

各一錢

苦練子

炙甘草

各五分

玄胡索

四錢

俱為末與前四味和勻酒煮麵糊為丸梧子大每

服二十九餓肚淡醋湯下忌油膩冷物酒麪

當歸附子湯 治臍下冷痛赤白帶下

柴胡七分良薑 乾薑 黑附子各一錢升麻 蝎梢各五

炙甘草六分當歸二錢炒黃鹽三分黃栢二分

每服五錢水煎服為丸子亦可

右炒鹽例東垣回陽丹註云必用炒黃鹽無則不效蓋寒疝之要藥也

固真丸 治白帶久下不止臍腹冷痛其寒捫之如冰

陰中亦然目中溜火上壅視物眈眈無所見齒皆惡  
熱飲痛須得黃連末擦之乃止惟喜乾食大惡湯飲  
此病皆寒濕乘其胞內故喜乾而惡濕肝經陰火上  
溢走於標故上壅而目溜火腎水侵肝而上溢故目  
中眈眈無所見齒惡熱飲者是少陽陽明中伏火也  
當大瀉寒濕以丸藥治之故曰寒在下焦治主宜緩  
大忌湯散以酒制白石脂白龍骨以枯其濕以炮薑  
大辛熱瀉寒水以黃柏之大寒為因用又為鄉導治

法云古者雖重罪不絕人之後又為之伏其所主先其所因之意又瀉齒中惡熱飲也以柴胡為本經之使以芍藥半錢以導之又恐辛熱之藥太甚損其肝經故微瀉之以當歸之辛溫大和血脈此用藥之法備矣

白石脂

燒赤水飛研細晒干

柴胡

各一錢

炮薑

四錢

黃柏

酒洗

白芍

各五錢

龍骨

酒煮水飛二錢

當歸

酒洗三錢

右為末水煮稀糊為丸芡實子大每服三十九空

腹時滾湯送下即以美膳壓之忌生冷硬物酒濕  
麵

補真潤腸湯 治白帶陰戶中痛控心而急痛身黃皮

緩身重如山陰中如水

一名助陽湯

即前固真湯減人參加防風高良薑

海藏香附六合湯 治赤白帶下

即四物加茴香桂也

大全方 治赤白帶下年深月久不瘥

白芍藥

二兩乾薑半兩

各炒黃色為末米飲下二錢日二服

丹溪治赤白帶下大法 或十棗湯神祐丸或玉燭散

皆可用之虛者不可峻攻實者可行

血虛加減四物湯 氣虛以人參白朮陳皮間與之

主治燥濕為先 濕甚者固腸丸 陰火動者諸藥

中加炒黃柏 滑者加龍骨赤石脂 滯者加葵花

白者治白

赤者治赤

性躁者加黃連 寒月少加薑附臨機

應變先須斷厚味 帶下與夢遺同法治之 肥人

有帶多是濕痰用海石半夏南星黃柏炒青黛蒼朮

川芎 瘦人帶病少如有者多是濕熱用炒柏蛤粉

滑石川芎青黛樗皮 帶漏俱是胃中痰積流下滲

入膀胱出於大腸小腸宜升提甚者上必用吐以提

其氣下用二陳湯加白朮蒼朮 治結痰白帶以小

胃湯半饑半飽津液下數丸俟鬱行却服補藥

白朮一兩蒼朮半兩紅白葵花二錢白芍藥七錢

右飭餅為丸空心煎四物湯吞二十九

一婦年七十形瘦善啖白帶食前薑湯吞大補丸五十

丸一二次午膳後及臨卧時各與小胃丹十五丸愈

乳香散 治赤白帶下

草果

一枚去皮入乳香一小塊用麪包煨焦存性連麪為末

每服二錢重者三錢陳皮湯調下

帶下不止用椒目白芷 治白帶以椒目為末米飲下

檳皮丸 治赤白帶有濕熱者

白芍

五錢

良薑

炒灰三錢

黃柏

炒成灰二錢

椿皮

一兩半

右為末粥丸每服三五十九米飲下

治白帶因濕熱而勝下者

蒼朮

鹽炒

白芍藥

滑石

炒各一兩

枳殼

甘草

各三錢

椿根

皮

炒

乾薑

炮各二兩

地榆

半兩

為末粥丸米飲下

治帶下

椿根皮

二兩

神麴

炒

麩麴

炒

黃柏

炒

蒼朮

各一兩

白芍

一兩

半

滑石

枳殼

各五錢

右為末糊丸梧子大空心服五十丸

赤白帶皆屬於血有出於大小腸之分黃荊子炒焦為

末米飲調三錢

固腸丸

治濕氣下利大便血白帶去脾胃陳積之後

用此以燥下濕亦不曾單用看病作湯使椿根白皮

為末粥糊為丸此藥性涼而燥須炒用一方加滑

石一半

地榆膏

治赤白帶下骨立者

地榆  
一斤

用水三升煎至一半去渣再煎如稠飭空心服三

合日二次

治漏下五色地榆三兩用醋一升煮十餘沸稍熟食前

服一合

治白帶因七情所傷脈數者

黃連

炒

側柏

酒蒸

黃柏

炒各半兩

香附

醋炒

白朮

炒

白芍

各一兩

白芷

燒存性

三錢

椿根皮

炒二兩

木香

三錢

為末粥九米飲下

千金方 治赤白帶下

三葉酸漿草陰乾為末空心溫酒下三錢

丹溪治赤白帶

龜板

酒炙二兩

黃栢

炒一兩

乾薑

炒一兩

梔子

二錢半

右酒糊為丸每服七十九日二服

又方 治帶下脈數者

枸杞根

一斤生地

五斤

右以水一斗煮取五升分五服

治帶下赤白腰痛或少腹痛有熱者

檗皮

二兩

玄胡索

桃仁

側柏葉

茴香

當歸

川練肉

各半兩

香附

八錢

官桂

烏藥

各三錢

麥皮曲

炒一兩

右為末酒糊為丸每服六十九神効

白芷散

治下元虛弱赤白帶下或經行不止等症

白芷

一兩

海螵蛸

二枚燒

胎髮

五九煨

為末每服二錢酒調下

東垣坐藥龍鹽膏

丁香

川烏

炮

木香

各一錢半

全蝎

五枚

良薑

木通

各一錢

防己

酒洗

枯礬

五分

龍骨

茴香

歸稍

炒黃鹽

防己

酒洗

紅

豆

肉桂

各二錢

厚朴

各三錢

玄胡索

五錢

右為末煉蜜九彈子大綿裹留絲在外納陰戶內

又方勝陰丹為上藥力小再取三錢內加行性熱藥

三賴子 川烏 大椒

各五分

柴胡

羌活

各二錢

全蝎

三枚

大蒜

破故紙

與蒜同焙

升麻

枯礬

各二分

麝香

少  
許甘松  
分三

右為細末同前制用

又方回陽丹

全蝎 升麻 甘松  
分各二  
羌活 草烏頭  
分各三  
水蛭

焙乾  
三條 蜜蟲  
翅足炒  
川烏 柴胡  
分各七  
大椒 葶撥

枯礬 三賴  
分各五  
大蒜 破故紙  
錢各二  
炒黃鹽  
此必錢

用之藥去  
之則不效

右為細末依前制如指尖大綿包納陰戶中覺臍

下煖為效

丹溪治胡安人白帶下月經甚多食少倦怠面黃經中有如血塊者有如筋膜者與參朮等補血氣調脾胃後諸症皆退惟帶未止以檇皮丸主之

張戴人治一婦帶下連綿不絕白物或來已三載矣兩手脈俱滑大有力六七至常上熱口乾眩暈時嘔酢水乃寒痰在胸中以瓜蒂散吐出冷痰二三升皆酢水也間如黃涎狀如爛膠次以漿粥養其胃氣又次

用導水禹功以瀉其下然後以淡劑滲泄之藥利其水道不數日而愈

又息城李左衙之室病白帶如水窈漏中綿綿不絕穢臭之氣不可近面黃食減已三年矣諸醫皆云積冷陽起石硫黃薑附之藥重重燥補污水轉多戴人斲之曰此帶濁水本熱乘太陽經其寒水不禁固故如此也夫水自高而趨下宜先絕其上源乃涌痰二三升次日下沃水斗餘行三遍汗出周身至明旦病人

云汚已不下矣次用寒涼之劑服及半載產一男

仲景溫經湯

吳茱萸

三兩

川歸

芍藥

芍藥

人參

桂枝

阿

膠

丹皮

生薑

甘草

各二兩

半夏

半升

麥冬

一升

右十二味水一斗煮取三升分溫三服亦主婦

人少腹寒久不受胎兼取崩中去血或月水過多

及至期不來

五靈散

治赤白帶下

五靈脂

半生半炒

為末酒調服

大千方 治白帶

茅花

炒一握

棕櫚灰

三寸

嫩蓮葉

三葉

甘草節

一錢

右為末空心酒調方寸匕

益母散 治帶下赤白惡露下不止

益母草

開花時採搗為末空心酒服二錢日三服

又方 治白帶用白芷以石灰炒去灰茜草少許粥糊

丸服

又方 白芍藥炒黑為末每服三錢匕酒調下

丹溪治赤白帶用生狗頭骨燒存性為末酒調服或入藥服

千金方 治帶下

雲母為末溫水調服三方寸匕立見神效

妊娠白帶

蒼朮

錢三

白芷

黃芩

二錢

炒各

黃連

炒

黃柏

炒

檮根皮

各

炒

一錢半

山茱萸

各二錢半

白芍

二錢半

為末糊丸空心酒服五十九

寡婦師尼寒熱如瘧

倉公傳與褚氏論皆云師尼寡婦獨陰無陽慾心萌而未遂是以懨懨成病以致乍寒乍熱而類瘧狀久則為勞又有經閉白淫痰逆頭風膈氣痞悶面黥瘦瘠等症皆寡婦之病診其脈獨肝部弦出寸口而上魚際皆血盛所致經云男子精盛則思室女人血盛則

懷胎觀其精血思過半矣

薛氏曰前症若肝脈弦出魚際用生地黄丸血虛佐以四物湯若兼怒動肝火而寒熱佐以加味逍遙散若虧損肝經而寒熱佐以八珍湯若虧損元氣而寒熱佐以補中益氣湯若鬱傷脾氣而寒熱佐以濟生歸脾湯

治一寡婦不時寒熱脈上魚際此血盛之症用小柴胡湯加生地黄治之而愈但畏風寒此脾胃氣虛用加

味歸脾湯補中益氣湯兼服而安

一婦因夫久出經商發寒熱月經旬日方止服降火涼血藥內熱益甚自汗盜汗月經頻數予曰內熱自汗乃脾氣虛弱也月經頻數乃血不歸脾也用歸脾湯六味丸而愈

一室女寒熱肝脈弦長而出寸口用小柴湯加生地烏梅治之而愈既嫁而諸症悉痊

一室女久患寒熱月經失期以小柴湯加生地治之少

愈更以生地黄丸而痊

生地黄丸 許學士云有一師尼惡風體倦乍寒乍熱

面赤心煩大小柴胡湯雜進其病益劇予診視之曰

三部脈無寒邪但肝脈弦長而上魚際服此丸而愈

柴胡 秦艽

黃芩

各五錢

生地

二兩

赤芍藥

一兩

右為末煉蜜為丸梧子大每服三十丸烏梅湯下

一日三服

逍遙散

治日夜虛熱脈微細

地骨皮

甘草

黃芩

川芎

各二錢

北柴胡

五錢

香附

三錢

右水煎空心服加竹葉十片

柴胡散

治寒熱往來此陰陽相勝陰勝則寒陽勝則

熱或是胎前雜病但服此湯如燒湯潑雪

北柴胡

黃芩

甘草

各三錢

地骨皮

一錢

荊芥

桂

各二錢

錢

水煎服

再仍服小柴胡湯三五帖

# 夢與鬼交

人稟五行秀氣而生承五臟神氣而養若調理失節氣血虛衰則鬼邪干其正隱避而不欲見人時獨言笑或時悲泣是其候也脈息遲伏或如鳥啄或綿綿而來不知度數面顏不變亦其候也

薛氏曰前症多由七情虧損心血神無所護而然也宜安神定志等藥則正氣復而神自安若脈來乍大乍小乍短乍長亦為鬼祟也宜灸鬼哭穴

以患人兩手  
拇指相並用

線紫北當合縫處半肉半甲間灼艾灸七壯  
若果是邪祟病者即乞求免灸云我自去矣

茯神散

治妄有所見言語雜亂時或昏昧痰熱

茯神

炒一兩半

茯苓

人參

石菖蒲

各一錢

赤小豆

五分

右水煎服

桃仁丸

治鬼魅交通

辰砂

另研

檳榔

當歸

桃仁

各三錢

水銀

一錢棗肉一枚研令星盡

麝香

阿魏

麝包煨

沉香

各半兩

右為末煉蜜為丸梧桐子大每服十九空心桃仁

湯下

辟瘟丹

虎頭骨

二兩

辰砂

雄黃

雌黃

鬼臼

皂莢

蕪

萸仁

鬼箭羽

藜蘆

各一兩

右為末蜜丸彈子大囊盛十丸男左女右繫臂上

及用一丸當病人戶前燒之一切邪鬼不敢近

妙香散 治心氣不足精神恍惚虛煩少睡盜汗等症

甘草

炙

人參

桔梗

各半兩

黃芪

茯神

去皮

茯苓

遠志

去心炒

山藥

薑汁炙各一兩

辰砂

三錢

麝香

二錢

木香

二錢半

右為末每服二錢溫酒調服

治婦人與鬼交

松脂 雄黃

先熔松脂乃入雄黃以虎爪不住手攪得所取如雞子黃大令患人卧以被蓋取藥薰之惟露頭在外勿令泄氣又不可過熱

鹿角散 男女夢與鬼交精神恍惚者

鹿角屑三指撮日二服酒下 亦治遺精 婦人被

妖魅狐貓祟迷惑不肯言鬼鹿角屑以水服方寸匕

即言實也

桃鳧 一名桃奴 一名梟景 是過年樹上不落乾

桃子味苦微溫主殺百鬼精物療中惡腹痛殺精魅

五毒不祥正月採之

熱入血室

婦人傷寒傷風發熱經水適來晝則安靜暮則譫語有

瘡狀此為熱入血室治者無犯胃氣及上二焦宜服小柴胡湯

薛氏治一婦經行感冒風邪晝則安靜夜則譫語此熱入血室也以小柴胡加生地治之頓安但內熱頭暈用補中益氣湯加蔓荊子而愈後因惱怒寒熱譫語胸肋脹痛小便頻數月經先期此肝火血熱妄行以加味逍遙散加生地黃而愈

一婦因怒寒熱頭痛譫言妄語至夜益甚月經暴至此

怒動肝火用加味逍遙散加生地治之神思頓清又  
用補中益氣湯而痊

一婦經行感冒譫語或用發散寒涼之劑前症益甚月  
經不止肚腹作痛嘔吐不食痰涎自出此熱入血室  
而藥復傷胃用香砂六君子歸脾湯而安

乾薑柴胡湯 治婦人傷寒經脈方來熱入血室寒熱  
如瘧或狂言見鬼

柴胡 錢一 桂枝 三分 牡蠣 煨

乾薑 炮

甘草

炙各 三分

瓜蒌根

五分

水煎汗出而愈

海蛤散 治婦人傷寒血結胸膈宜服此藥及針期門

穴

海蛤 滑石

煨水飛

甘草

各二分

芒硝

一兩

右為末每服二錢用雞子清調下小腸通利其結血自散更用桂枝紅花湯發其汗則愈

桂枝紅花湯 治傷寒發熱口燥舌乾經脈不行

桂枝 芍藥

炙甘草

各一錢

紅花

二錢

右薑棗水煎服良久更進汗出可解

加味逍遙散 肝脾血虛有熱遍身搔痒或口燥咽乾  
發熱盜汗食少嗜卧小便澁滯等症又治療瘰流注  
虛熱等瘡熱入血室等症

炙甘草

當歸

炒

芍藥

酒炒

茯苓

白朮

炒

各一錢

柴胡

丹皮

山梔

炒各五分

水煎服

逍遙散

即前方去丹皮山梔

加味小柴胡湯 治經水適來傷寒或經水適止傷寒  
晝則明了夜則發熱譫妄如狂 即小柴胡加生地

黃牡丹皮

心胸嘈雜

婦人嘈雜此脾胃鬱火痰滯血液淚汗而成用猪血炒  
食之乃以血導血而使之歸源耳旋覆花湯尤善

薛氏曰若因食鬱用六君子山查山梔若因胃熱用二  
陳薑炒芩連若因六鬱用越鞠丸若因氣滯用四七

湯桔梗枳殼大抵此症屬病氣元氣俱不足須用六君子為主少佐以治痰之藥若以火治之必變吞酸中滿

一婦飲食少思胸中嘈雜頭暈吐痰此中氣虛而有熱用六君子湯加炒黑梔子桔梗而愈後因勞役頭暈發熱吐痰不食用補中益氣加半夏茯苓天麻而痊一婦中脘嘈雜口中辛辣或咳嗽吐痰發喘面色或白或赤此脾氣虛而肺中伏火也用六君子加山梔桔

梗柴胡及炒黑片苓治之愈

一婦嘈雜吞酸少食大便不結此脾氣虛寒而下陷用  
補中益氣湯加茯苓半夏炮薑漸愈又常服人參理  
中丸而安

一婦飲食後嘈雜吞酸此食鬱為痰用六君子送越鞠  
丸漸愈又用加味歸脾湯而痊後因怒兩脇脹痛中  
脘作酸四君子湯送左金丸漸安仍用六君子湯送  
越鞠丸而痊

旋覆花湯 治脾胃虛寒中脘停痰汪洋嘈雜腸鳴多

唾嘔吐不食脇肋脹痛脈沉遲弦細

細辛 旋覆花 橘紅 桂心 人參 炙甘草

苦梗 白芍 半夏 各五分 赤茯苓 三分

用水加薑煎服

又心胸嘈雜茯苓補心湯最妙

茯苓補心湯 治面色黃瘁五心煩熱咳吐血及嘈

雜潮熱等症

半夏 前胡 紫蘇 茯苓 人參 枳殼炒 桔梗

炒 炙甘草 乾葛 各五分 川芎 川歸 白芍 陳皮

各一錢 熟地黃 半錢

入薑棗水煎服

痲痺疝瘕

婦人痲痺因元氣虛弱而邪氣積聚蓋痲痺者在腹內  
近臍左右有筋脈急痛如臂如指如痲之狀痺者僻  
在兩脇之間有時而痛皆陰陽不和經絡痞隔飲食

停滯冷氣固結而成也

婦人臟腑調和經脈循環則月水以時故能生子而無病若乘外邪而合陰陽則小腹胸脇腰背皆相引而痛月事不調陰中腫脹小便淋瀝面色黃黑則疝瘕生矣疝者痛也瘕者假也脈弦急者生虛弱者死尺脈濡浮牢為血實氣虛腹痛逆氣上行此為胞中有惡血久則結成瘕也

張子曰遺溺閉癰陰痿瘰癧精滑白淫皆男子之疝

也若血涸月事不行行後小腹有塊或時動移前陰突出後陰痔核皆女子之疝也但女子不謂之疝而謂之瘕

婦人積年血瘕由寒溫失節脾胃虛弱月水不通相結盤牢久則腹脇苦痛宜用三稜煎主之

治瘕癖神效 以獾猪肝一具重十餘兩用巴豆仁五十枚入肝內用醞醋三碗慢火熬乾研爛量入三稜末丸作梧子大每服五丸食前熱酒下

經行腹痛乃疰癖癥瘕局方積氣丸妙

蘆會丸 治疰癖肌肉消瘦發熱潮熱飲食少思口乾

作渴或肝疰食積口鼻生瘡牙齦蝕爛等症

蘆會 胡黃連 黃連焦炒 木香 白蕪荑炒 青皮各五

錢 當歸 茯苓 陳皮各一兩半 炙甘草七錢

右為末米糊丸梧子大每服七八十九米湯下

麝香丸 治疰癖冷氣心腹作痛

麝香二錢另研 五靈脂炒 阿魏五錢麝包煨麝熟 桃仁 三稜醋製

各二兩

芫花

醋炒

檳榔

各一兩

莪朮

醋煨

桂心

沒藥

木香

當歸

各五錢

右為末飯九梧子大每服十九淡醋湯下

阿魏膏 治一切瘡塊更服胡連丸

羌活 獨活 玄參 官桂 赤芍 生地 穿山

甲 兩頭尖 大黃 白芷 天麻 各五錢 紅花 四錢 木

鼈子

去殼十枚

亂髮

五錢

槐柳桃枝

各三錢

右用香油二觔四兩煎黑去渣入髮油內煎髮化

仍去渣徐下黃丹煎軟硬得中入芒硝阿魏蘇合  
香油乳香沒藥各五錢麝香三錢調勻成膏攤貼  
患處內服丸藥 凡貼膏藥先用朴硝隨患處鋪  
平半指厚以紙蓋用熱熨斗熨之良久如硝耗再  
加熨之二時許方貼膏藥 若是肝積加盧會末  
同熨

乾漆散 治疰瘕脇肋疼痛

乾漆

炒令烟盡

木香

芫花

醋炒

赤芍

桂心

川歸

川

芎

琥珀

各五錢

大黃

炒二兩

牛膝

一兩

桃仁

去皮尖一兩另研

麝

香

一錢

右為末每服一錢溫酒調下

桃仁煎 治血瘕

桃仁

大黃

炒各一兩

蜜蟲

炒黑五錢

朴硝

一兩

右為末以醇醋一鍾石器中煮三分下前三味不

住手攪煎至可丸下朴硝丸梧子大不吃晚食五

更初溫酒下五丸日午下穢物如未見再服仍以

調氣血藥補之

此方乃峻劑也下血塊血積甚速氣血虛者慎之

大硝石丸

治七癥八瘕當用此藥去之不令人困

大黃

四兩

硝石

三兩

人參

一兩

甘草

八錢

右為末苦酒一升石器中先入大黃煎膏入餘藥

丸梧子大每服三十九米飲下三日一服宜下赤

物

蟠葱散

治寒氣不散疝瘕脹痛脇肋痛甚神效男子

婦人脾胃虛冷氣滯不行

延胡索

肉桂

乾薑

炮各四分

蒼朮

米泔水浸一宿焙

甘草

各二

錢

砂仁

檳榔

丁皮

各一錢

三稜

煨

莪朮

煨

茯苓

青皮

去白各七分

連根葱白一莖水二鍾煎至熟服

寶鑑疾藜湯

治陰疝小腹作痛小便不利手足逆冷

或脇腹悶痛

疾藜子

去刺

大附子

炮

梔子仁

各半兩

右為末每服三錢水煎食前服

穿山甲散 治癰瘡瘀血心腹作痛

穿山甲

灰炒  
燥

鼈甲

醋炙

赤芍

大黃

炒

乾漆

炒無  
烟

桂心

各一  
兩

川芎

芫花

醋炒

歸尾

各半  
兩

麝香

一  
錢

右為末每服一錢酒調下

三稜煎 治血癥血瘕食積痰滯

三稜

醋浸  
炒

莪朮

製全上  
各三兩

青皮

去  
白

半夏

麥芽

炒各  
一兩

右用好醋一鍾煮乾焙為末醋糊丸梧子大每服  
三四十丸淡醋湯下痰積生薑湯下

脬轉小便不利

婦人脬轉或內熱傳搏於脬或忍小便氣逆於內以致小腹急痛不得小便甚者至死

薛氏曰前症不問男女孕婦轉筋小便不利命在反掌非八味丸不能救

一婦因鬱怒小便滴瀝漸至小腹腫脹痰咳喘促用八味丸料煎服小便即利而痊

葱白湯 治氣滯小便不通腹脹欲死

陳皮

三兩

葵子

一兩

葱白

一握

水煎分三服

八味丸

治轉脬小便不通殊有神效但世所不用以

致悞人

方見虛損

滑石散

脬轉數日不通

滑石

一兩

寒水石

二兩

葵子

一合

右研以水一斗煮至五升每服一升即通利

又方

亂髮煖 葵子 車前子

各等分酒調下二錢

強忍小便致脬轉尿不利困篤欲死

滑石二兩 髮灰一兩

為末每服三錢桃白皮一觔細切搗熟入水三盞

絞取汁調服

千金翼用杏仁去皮尖二十枚麩皮炒黃嚼細水送下

立通

一方 皂角為末吹鼻內取嚏

石葦湯 治脬轉小便不通及小便實熱氣滯淋瀝

石葦 黃芩炒 木通 葵子 榆白皮 瞿麥 甘

草 各五分

加生薑水煎服

小便數

薛氏曰小便數頻若肝經火動用逍遙散加龍膽草車

前子

膀胱火動六味地黄丸加麥門冬五味子

肝腎濕熱龍膽瀉肝湯 鬱傷肝脾加味逍遙散加味

歸脾湯 脾肺氣虛補中益氣加麥冬五味 肝經

血虛加味逍遙散 腎氣虛敗鹿茸散如不應 用八

味丸

桑螵蛸散 治腎氣虛寒小便數少或時頻數或夜間

尤數

桑螵蛸

炒三枚

鹿茸

炙

牡蠣

煨

炙甘草

炙黃芪

右為末每服二三錢食前空心用薑湯調下日二服

縮泉丸 治脬氣虛寒小便頻數或遺尿不住小兒尤效

烏藥 益智仁

各等分為末酒煮山藥糊為丸梧子大每服七十丸鹽酒或米飲下

鹿茸散 治腎氣虛寒便溺數甚或夜間頻數遺溺

鹿茸

炙

烏賊魚骨

桑寄生

川歸

龍骨

煨各二兩

白

芍

炒

附子

炮各

三錢

桑螵蛸

炙五錢

右為末每服二錢空心并食前溫酒調下作丸亦

可

遺尿失禁

附小便出尿此名交腸病也

內經曰胞移熱於膀胱則癰溺血膀胱不利為癰不約為遺溺註云膀胱為津液之府水注由之然足三焦脈實約下焦而不通則不得小便足三焦脈虛不約

下焦則遺溺也靈樞曰足三焦者太陽之別也並太陽之正入絡膀胱約下焦實則閉癰虛則遺溺

良方曰此乃心腎之氣失其常度故有便道澀而遺者有失禁而不知自遺者亦有傷產傷膀胱不時而遺者有脬寒臟冷而不自知者

薛氏曰設肝腎虛熱廷孔痿痺用六味丸如不應用加減八味丸陽氣虛憊膀胱積冷用鹿茸丸如不應用八味丸若脾氣虛弱不能禁止用補中益氣湯加山

藥山茱萸五味若肺氣虛寒前湯加桂附此症屬虛  
熱者多真寒者少治宜審察

一婦小便自遺或時不利日晡益甚此肝熱陰挺不能  
約制用六味丸料加白朮黃柏酒炒黑七分知母五  
分數劑諸症悉愈若誤用分利之藥愈損真陰必致  
不起

一老婦患前症惡寒體倦四肢逆冷余以為陽氣虛寒  
用補中益氣湯加附三劑不應遂以參附湯四劑稍

應仍以前藥而安附子計用四枚人參三觔許

一婦病愈後小便出尿此陰陽失於傳送名大小腸交也先用五苓散二劑而愈又用補中益氣湯而安

鹿茸丸 治陽氣虛小便白濁滑數不禁或臍腹陰冷

大便不實

鹿茸

炙

椒紅

桂心

石斛

附子

炮

牡蠣

煨

補骨

脂

炒

肉蓯蓉

雞肫皮

炙

沉香

各一兩

桑螵蛸

炙三錢

錢

右為末酒糊丸梧子大每服三十九丸空心溫酒下

秘元丹 治陽氣虛小便不禁或夜多小便頻數

白龍骨

煨三兩

訶子

十枚去梗


砂仁

一兩

右為末糯粥丸梧子大空心鹽湯下五十丸酒亦可

又方 鹿角鎔屑炒為末每服三五錢空心熱酒調下  
又方 雞胗炙為末每服二三錢空心食前酒調下  
日三次

又方 桑螵蛸酒炒為末每服二錢空心薑湯調下



赤水元珠卷二十